

Legria e festa per la Viafier retica VR

■ **(anr/grc) Grond plaschair tar la Viafier retica (VR) ed en tut il Grischun. Pir il glindesdi saira tard èsi vegnì comunità che il comité dal patrimoni mundial da l'Unesco haja acceptà la candidatura svizra-taliana da la Viafier retica en la cuntra-da Alvra Bernina per il patrimoni mundial.** Ils schefs da quella viafier han accentuà ier a chaschun d'ina conferenza da pressa a Cuira: «Nus vulain far insatge londerora e mantegnair il contact», ha *Erwin Ruthishauser*, mader da fatschenta da la VR, ditg. La Viafier retica sin la lingia d'Alvra Bernina è pir la terza viafier ch'è vegnida recipida da l'Unesco sco patrimoni mundial, sper la «Semmeringbahn» en l'Austria e la «Darjeeling-Himalayan Railway» en l'India. Sin la fiera è gia in guid da viadi da quasi 100 paginas che declera ils monuments perlung questa lingia da viafier. Ultra da quei datti in uschenunà «Unesco-Pass» cun dus dis viadi gratuit sin la lingia da viafier Alvra e Bernina sco era sin quella dal «Glacier Express» che giran dal tut u per part sin la lingia da patrimoni mundial.

«Na betg mo trais linguas, mobain era trais stagiuns»

Sco che cusseglier guvernativ *Claudio Lardi* ha agiuntà en ses pled na traversian ils passagiers da

la VR sin questa lingia betg be territoris da trais linguas sin ils 122 kilometers binaris da 100 onns vigliadetgna da Tusaun a Tirano, mabain tut segund tge mais era trais stagiuns: «Primavaira a Tusaun, enviern sin il Bernina e stad en il Puschlav», ha manegià Lardi.

«In exempel perfect per multifariadad culturala», uschia ha *Jean-Frédéric Jauslin*, directur da l'Uffizi federal da cultura (UFC), signiftgà il nov lieu da patrimoni mundial da la VR. La Viafier retica saja dapli che be in simbol, i sa tractia d'ina ovra tecnica miraculosa, ha cuntinuà Jauslin. Er Claudio Lardi ha fatg a savair: «Questa lingia da viafier ed il conturn furman ina ovra d'art en general – ina simbiosa tranter natira e tecnica.»

Quest label è er ina sfida

Il titel «Patrimoni mundial da l'Unesco» oblighescha. El sto vegnir resguardà sco schanza unica per la Viafier retica e per la colliaziun da la regiuns, per il Grischun e finalmain era per la Svizra. Il zercladur 2007 è vegnida fundada l'uniun purtadra «Patrimoni mundial da l'Unesco – Viafier retica» cun la finamira da garantir la coordinaziun tranter las differentas instituziuns involvidas. Surtut duai l'uniun garantir il mantegniment sco era l'utilisaziun durabla e la receptibladad

dal patrimoni mundial. *Erwin Ruthishauser*, parsura da la direziun da la Viafier retica, ha manegià: «Cun purschidas turisticas unicas e cun infurmaziuns cumplexivas ed autenticas vulain nus entusiasmar noss giasts da la Svizra e da l'exteriur sco era la populaziun indigena per las valurs particularas da quest patrimoni mundial.» La basa per questa incumbensa furmia il plan da gestiun che saja vegnì elavurà ensemen cun il dossier da nominaziun tenor las valurs e las finamiras da l'Unesco, èsi vegnì comunità ier a Cuira.

Tutgiez dals zains e festa

Per exprimer la legria da quest eveniment unic han ier a las 12.00 tutgà en differentas vischnancas ils zains per 10 minutas per lung dal tschancun da la lingia da viafier che s'extenda da Tusaun enfin Tirano. A Cuira avànt l'edifizi da l'administraziun da la Viafier retica è vegnì festiva cun il punct culminant d'ina show d'art da glisch curt avant las 22.00.

Per la fin d'emna dals 12 fin ils 14 da settember 2008 planisescha la Viafier retica ina gronda festa populara ensemen cun organizaziuns partenarias per lung da la lingia dal patrimoni mundial Alvra Bernina. La lingia da Tusaun fin a Tirano duai sa midar en in bindel cotschen festiv.



Claudio Lardi, Jean-Frédéric Jauslin, Hans-Jürg Spillmann ed Erwin Ruthishauser han purtà la buna nova da la VR sco patrimoni mundial da l'Unesco.